

## 2 Timotius

# Paulus susura kadua na fee nonoon Timotius

### *Soda-mole'*

**1-2** Timotius au ana susuek!

Susura' ia neme au mai, Paulus, fo Manetualain here na au dadi u' Yesus Kristus lahenda nadedenun. Yesus nadenu au aru'u-alosa' soda-mole' manabasa ta'a. Soda-mole' manabasa ta'a ria, Manetualain helu basa neu' lahenda kamahere' ara.

Timotius! O sama leo' au ana boki ka. De, au hule-haradoi fo Manetualain ita Aman no Yesus Kristus ita Ramatuan, ela Ara sue-lai ma ratudu dale malole nara ma fee o masoda no tetu-tema', mole-dame, ma tesatei-tamadale'.<sup>✳</sup>

### *Paulus hule makasi neu' Manetualain*

**3** Hatu-leledon au hule-haradoi fee o. Au hule makasi neu' Manetualain, nana huu o tuka mahere Ni. Au alalau Manetualain no dale malalao-malalafu', sama leo' ita bei-ba'i nara ralalau Ni.

**4** Au afarene tepo' fo ita tasida' a, o luu ma tuda. Au dale ka nahii' naan seli aneta oo o selu', ela au dale ka namaho'o.

**5** Au boe afarene tepo' fo o mulai mamahere tebe-tebe neu' Ramatua Yesus. Namahere rupa leo na' a, nahuu-naoka mema' nai o beim Luisa ma o mamam Eunike dale nara. Ma au boe

---

<sup>✳</sup> **1:1-2** Lahenda Nadedenu' ara Tutuin 16:1

amahere tebe-tebe ae, namahere rupa leo na' a  
nasoda nai o dale ma.<sup>◊</sup>

*Paulus hule Timotius nalala'o babati-papala'  
neme Manetualain mai*

<sup>6</sup> Tepo' fo au fua lima ka neu' o laka ma, ma  
hule-haradoi fee o. Manetualain fee o bebe'i-  
bara'ai' losa' moi-tao fee Ni. De, besa' ia au hule  
fo o mamomori' selu' babati-papalam ria.

<sup>7</sup> Huu fo Manetualain Dula-dale Na, ta fee  
ita dadi teu' lahenda manabii'. Tehuu Ana fee  
ita bebe'i-barai', henu' no susue', ma tauli  
tatalolole ao-ina ara.

<sup>8</sup> De, boso' bii-mae' dedea la'eneu' ita Ramatua  
na. Boso' bii-mae', nana huu au lahenda man-  
ahuku'. Tuka matetu na huku au, nana huu au  
alalau Ni. Maneniko o tui-beka Ramatua' Harad-  
asin, sona o muste sadia lepa-masaa susa-lela  
sama leo' ami boe. Maneniko hapu susa-lela  
leo na', sona neu' ko Manetualain fee o bebe'i-  
bara'ai'.

<sup>9-10</sup> Huu fo Manetualain ri' soi-tefa na ita teme  
sala-siko ara mai.

Ma, Ana here na ita dadi teu' lahenda  
malalao-malalafu'.

Ana natudu dale malole Na neu' ita, nana huu  
Ana sue-lai ita.

Sekonaa te, ita ta tao hata esa boe', fo tao na  
ita taraa sipo Ria dale malole Na.

Manetualain beita sura-adu dae-bafo' a tehuu  
Ana naetu' so ela fee Yesus Kristus mai,  
fo natudu dale malole Na, ma fee ita soda-  
mole' manabasa ta'a.

Besa' ia Yesus Kristus mai fo tao natetu Manetu-  
alain na'e'etu Na so.

---

<sup>◊</sup> 1:5 Lahenda Nadedenu' ara Tutuin 16:1

Ana nalulutu' mamates a kuasa na so!

Bea ri' namahere neu' Ramatua Yesus,  
neu' ko ana hapu soda-mole' manabasa ta'a.  
Hihii-nanaau' ia tebe dadi Tutui Malole!

<sup>11</sup> De Manetualain so'u na au dadi u' Yesus  
Kristus lahenda nadedenun, fo au tui-beka Tutui  
Malole Na, ma au anori lahenda rai basa ma-  
mana' ara.<sup>☆</sup>

<sup>12</sup> Huu fo besa' ia au doidoso nai bui ia dale',  
nana huu au alala'o Yesus Kristus pareta Na. Leo  
mae leo' na boe au ta bii-mae', nana huu au  
bubulu' bea ri' au amaheren ri' Ramatua Yesus.  
Ma au boe bubulu no matetu', Ana nabe'i nanea  
nonoi-tatao' ia, nana huu Ria ri' fee au. Neu' ko  
Ana fee bebe'i-bar'a'ai' ela au alala'o nonoi-tatao'  
ia losa' Ana natafali selu' mai.

<sup>13</sup> De, manori tuka nanori roo-tetu' fo au  
atudun neu' o so a. Mamahere maroo ma sue-  
lai basa lahenda ra fo natudu nae, o dadi esa'  
mo Yesus Kristus so.

<sup>14</sup> Manetualain fee o hata mabeli esa so, ri'  
nanori roo-tetu' a. De, maboi matalolole hata  
ria, o! Hule Dula-dale Malalao-malalafu' fo nai  
ita basa dale na, ela Ana tulu-fali' o maboi hata  
ria no malole.

### *Onesiforus tulu-fali Paulus nai bui dale'*

<sup>15</sup> Tantu o mamanene rae, Figelus no Hermo-  
genes, ma lahenda feke' fo reme propinsi Asia,\*  
ara foa ela au so.

<sup>16-18</sup> Tehuu, Onesiforus sona feke'. Ana ta heo'  
neme au mai. O mita mata' ma'ulu na au bei nai  
kota Efesus, ana tulu-fali au naroo. Fai fo ana  
mai nai kota Roma ia, ana saka nalelei' au nai

<sup>☆</sup> **1:11** 1 Timotius 2:7    \* **1:15** Fai a ulu na propinsi Asia, nana  
ri' besa' ia dadi neu' negara Turki a po' muri na.

basa mamana' ain. Mate'e na ana hapu au nai bui dale'. Tehuu ana ta mae' fa. Ana mai dama au la'o-naroo nai bui ia, ela natetea au dale ka.

De, au hule-haradoi fo Manetualain, natudu dale malolole Na neu' Onesiforus no basa kileoboboki nara. Naraa no dae-bafo' a nonoe na, Manetualain naetu' lahenda ra dedea' nara, au amahehena' fo Ana naetu' no malole neu' Onesiforus.

## 2

*Ita mana tuka Kristus, muste tasoda sama leo'  
soldadu fo tuka naroo malaka na*

<sup>1</sup> Timotius, au ana susuek! Huu no Yesus Kristus, dale malole Na, Ana nau fee selu' o bebe'i-bar'a'i'. De, o muste sipo' ana leo, huu fo mabua mo Ni so.

<sup>2</sup> Ma'ulu' na au anori o la'eneu' Manetualain eno roo-tetu Na nai lahenda dodou' matan. De, besa' ia au hule neu' o, ela basa hata fo o mamanene neme' au mai so a, mu manori selu' asa fee lahenda fo o bisa mamahere si. Ara muste ranori ralela' nanori' ria neu' lahenda feke' ara bali.

<sup>3</sup> Ita basa ia nana, sama leo' Yesus Kristus soldadu nara. De, ita lepa bela' doidoso' sama leo' Ria boe. Huu no o nana soldadu malole, de o muste lepa ma nuu babati ma.

<sup>4</sup> Soldadu fo nalala'o nonoi laka' a, ana ta neu sososo' no nonoi-tatao feke' bali. No ria na, ana tao na malaka na namaho'o.

<sup>5</sup> Hai natutudu feke' neme napo'i lalai' a mai. Maneniko ita tapo'i lalai', sona muste tuka atoran a. Maneniko ta'a sona dea' teu leo, huu fo ta seki so'. Leo' na boe maneniko ita nau talala'o

Ramatua' a nonoi-tataon, sona muste tuka atoran a.

<sup>6</sup> Mete neu' lahenda maue-maosa a boe. Ana noi-tao mela-maku naan seli nai oka-tinen. Huu no ana tao leo na', de hapu na'ulu' oka-tinen buna-boan.

<sup>7</sup> Afi matalolole natutudu' sira. Neu' ko Manetualain fee o bubulu' basa sira.

<sup>8</sup> Afi matalolole neu' Yesus Kristus. Ria nana, mane Daud a tititi-nososin. Ana mate, tehuu Manetualain fee Ni nasoda selu'. Dede'a' ria dadi neu' Tutui Malole fo au uu tui-bekan nai basa mamana' ain.

<sup>9</sup> Huu no au tui-beka Tutui Malole ria, de au hapu doidoso leo ia'. Lena-lena' bali ara heke au reni' rante, sama leo' au lahenda tadalu'. Leo mae leo' na, tehuu ta bisa heke Manetualain Hara-dasin fa.

<sup>10</sup> De, au sadia lepa doidoso rupa' ara. Sadi Manetualain lehenda teteka-hehere nara bisa hapu soda-mole' manabasa ta'a. Neu' ko Ana so'u namadedema si la'o naroo, nana huu ara dadi reu' Yesus Kristus lahenda nara.

<sup>11</sup> Dede'a-nafada' ia ra mema' tetebes ara:  
"Maneniko ita sipo' tae, Kristus mate kati ita,  
    ria sama leo' ita boe mate la'o ela masoda paraa' a,

    fo tasoda sama-sama too Ni.  
<sup>12</sup> Maneniko ita tanenete nai doidoso a sama leo'  
    Kristus,

    ita boe tatuu' hopu pareta sama-sama too Ni.  
Tehuu maneniko ita talena Ni,

    Ria boe nalena natafali' ita.<sup>◊</sup>

<sup>13</sup> Leo mae ita ta dite-tama too Ni,  
    Ana dite-tama no ita losa do-doo na neu,

---

<sup>◊</sup> **2:12** Mateos 10:33; Lukas 12:9

Ana ta bisa dedea fufudi' fa. Hata fo Ana dedea ni neu' ko Ana tao natetun."

*Lahenda mananoi-manatao fo Manetualain iosi*

<sup>14</sup> Mafarerene' fee lahenda kamahere' ara, ela boso' rafarene hen'i basa hihii-nanau' ia ra. Madenu neni' Manetualain nade Na, ela ara hahae rasisipo bafa' la'eneu' dedea' a sosoaa na. Huu fo basa sira sosoaa-raraa' ta'a. Noi ralutu lahenda mamanene ra dudu'a-aafi nara.

<sup>15</sup> Makate moi-tao ela hapu i'io neme' Manetualain mai. Lahenda leo na' ara ta parluu bii-mae' fa, nana huu tao natetu ria nonoi na no malole. O muste dadi lahenda manamanori Manetualain Dedeaa-nafadan no roo-tetu'. Huu fo, Dedeaa-nafada' ria tebe!

<sup>16</sup> Madoo' a neme' dedea' fo ta nanuu hupeda', ma neme' dedea-nafada fo ta neni hadahoromata neu' Manetualain. Dedeaa-nafada leo na' a tao na lahenda boe-boe tao tadalalu.

<sup>17</sup> Dedeaa-nafada tadalu nara ralalaba sama leo' diopado'. Himeneus no Filetus dedea nara leo na'!

<sup>18</sup> Dua si ranori sala rae, basa lahenda mana mate' ara rasoda fali' so. Tehuu ta tebe leo na' fa! No ria na, ara heo doo' a reme eno roos a mai. Hata fo ara ranori ni a, tao ralutu lahenda rumu namahere nara.

<sup>19</sup> Tehuu tutuu-tetende' fo Manetualain nafoa ni a, ta natakeko. Nai tutuu-tetende' ria mandui' nae, "Ramatua'a nalela' Ria lahenda nara", ma "Lahenda fo do'o-tabe neu' Manetualain, ana muste nadoo' a neme' tadalu' a mai." Tutuu-tetende' ria, nana ri' Manetualain lahenda nara. <sup>◊</sup>

---

<sup>◊</sup> 2:19 Susura Dudui Nade' a 16:5

**20-21** Nai lahenda kamasu'i ara uma nara dale' hapu hata-heto rupa' ara. Ruma tao si reme lilopilas ma lilofula' a mai. Tehuu ruma tao si reme ai ma daepilas mai. Hata-heto malole ra manuu uma' a namaho'o pake si rai feta-dote bauina'. Tehuu hata-heto bale-bale fai' manuu uma' a mae' pake si rai lahenda matan. Leo' na boe lahenda ra. Maneniko bea nadoo' ao na neme tadalu' a mai, ana sama leo' hata-heto malole ra. Mauma' a nahii' pake ni, nana huu nanuu sosoa-raraa' fo tao nonoi-tatao malole rupa' ara.

**22** Lahenda muriana' ara, muda' laesa' nanahiki', nana huu tuka hihii-nanau ao-paa'. Tehuu Timotius, o muste manea matalolole ao ma, fo boso' tuka hihii-nanau ao-paa leo na' a. Tuka-saka mahere nonoi-tatao malole. Mamahere maroo neu' Ramatua' a. Masoda no nasue-nalai ao' ma mole-dame mo basa lahenda ra. Basa lahenda fo ramahere neu' Ramatua' a, ma rasoda no dale malalao-malalafu', ara rahii' tao malole la'o naroo. De, Timotius! O muste masoda sama leo' sira, e!

**23** Au afada selu' bali! Boso' masisipo bafa' neu' dedea' fo ta nanuu hu-peda'. Basa sira tao fee lahenda rahuu-ralena.

**24** Lahenda fo roi-tao fee Ramatua' a, ta naraa rahuu-ralena'. Ara muste balaroi-balau' basa lahenda, ranori ralela' lahenda, ma ranuu dale nanenete' neu' lahenda manasaka dedea' ara.

**25** Ara muste ralala'o no dale malole neu' lahenda fo soa' asa. No ria na, Manetualain bisa tao nabeu dale nara, losa saledale-tu'etei nara, ela sipo' ra hata roo-tetu' a.

**26** No ria na, ara bisa rasaneda-rafarene selu'

bali, boe ma po'i ao nara reme' nitu ra malaka na mai. Huu fo ana heke-pa'a naa si so, ela tuka noi ria hihii-nanaun.

### 3

*Lahenda ra nonoi-tatao tadalu nara nai dae-bafo' a nonoe na*

<sup>1</sup> Timotius! Nanenea' no dae-bafo' a fai nonoe na, susa-lelan dodou' naan seli. Au afada mema' o leo na'.

<sup>2</sup> Neu fai' ria lahenda sue noi sira ao-in a heheli nara. Du'a-afi nai doi-tali. Ara radedema ao nara, ma radadae lahenda feke' ara. Ara soa ramumulu' a. Ara ta nau ramanene ina-ama, ta hule ralela' makasi, hada ta' ara, ara ta rahii' hata fo la'eneu' Manetualain.

<sup>3</sup> Ta nau sue-lai lahenda. Ta nau mole-dame ro lahenda. Ara rahii' ramumulu lahenda. Ara ta ranenete rala ao nara. Tadalu raan seli ma ta rahii' dedea' malole.

<sup>4</sup> Rahii' se'o hen i tia-lai, ta dodoo-tatai naru', tao uni sira ralela', tuka hihii-nanau' ao-paa' a lena hen i tuka Manetualain.

<sup>5</sup> Ara tao ao nara dadi' lahenda fo tuka Manetualain boe, sekona te rou'. Manetualain kuasa na ta nai sira dale nara fa. Boso' manenea' mo lahenda rupa leona' ara.

<sup>6</sup> Lahenda rupa leo na' ara, kodi lahenda uman reu no mata-idu maleleka nara, fo reu fufudi-lele'o ina' fo dale na balanau' fo ri' muda laesa' hapu sosoba' a. Ina rupa leo na' ara, masoda nara lepa sala-siko dodou' naan seli, ma tuka hihii-nanau aopa rupa' ara.

<sup>7</sup> Ramanene mese bebeu' mai ranori hata bebeu', sona roi tuka-tuka' a. Tehuu ara ta parna bubulu' bea ri' la'e ma bea ri' sala.

<sup>8</sup> O mafarene Yanes no Yamres tutui na, hete?\* Tepo' ria dua si ralelena' roo ba'i Musa. Mesen besa' ia ra, hada-parii nara leo na' boe. Ara ta sipo' nanori matetu' a. Sira dudu'a-aafin ta malole a, ma namahere nara ta tuka matetu na so'.

<sup>9</sup> Mesen pepeko' rupa leo na' ara, ta bisa ranenete rala doo' a. Doo-doo boe ma basa lahenda bubulu' koa-pakanaa nara! Samaleo' fai ma'ulu na lahenda ra bubulu' Yanes no Yamres napuputa nara.

### *Homu mahere nanori' fo o sipo a*

<sup>10</sup> Timotius! O bubulu' katema' au masoda ka so. O bubulu' basa hata fo au anori-afada. O bubulu' au masoda ka. O bubulu' au dudu'a-aafi ka. O bubulu' hata fo au amahere. O mita mata' au dale nanenete ka neu' lahenda ra, ma au susue-lalai ka neu' asa. O bubulu' au anenete tao leo' bea, nai au doidoso ka dale'.

<sup>11</sup> O boe bubulu' ara fepa-li'u ramimina' au, losa au lepa doidoso rupa' ara. Au hapu doidoso leo na' ara nai kota Antioquia, Ikonium ma Listra. Tehuu leo mae leo' na boe Ramatua' a po'i na au eme basa sira mai.†

<sup>12</sup> Tebe basa lahenda fo ramahere neu' Yesus Kristus, ma nau rasoda no makamoi' tuka Mane-tualain hihii-nanaun, tantu lahenda tao doidoso si.

\* **3:8** Nade' 'Yanes no Yamres' ta nai Susura Makamoi' a. Tehuu hapu lahenda malela' ruma rae, bate sira dua, nana lahenda malela' reme Masir mai, fo soa' Musa tepo' fo ana nau no lahenda Israel ara kalua reme Masir mai. Lees tutui' ria nai susura' Kalua reme Masir 7:11. † **3:11** Lahenda Nadedenu' ara Tutuin 13:14-52; 14:1-7, 8-20

<sup>13</sup> Lena-lena' bali lahenda tadalu' ara, ro mapuputa' ara, boe-boe tadalu raroo. Ara tipu-dai ratuda lahenda feke' a, sekonaa te sira nanatipu' boe.

<sup>14</sup> De, o muste homu mahere nanori' fo o sipo ni a. Ma hata fo o mamahere ni a, tuka maroo ni. Huu fo ria nana roo-tetu'! O bubulu' matetu', bea ri' nanori basa sira neu' o, hete? O bisa mamahere si!<sup>†</sup>

<sup>15</sup> Mulai neme o bei aanam ria mai, o bubulu' Susura Makamoi' a isi-liin! Susura' sira ratudu fee eno masoda', fo masoda mabua mo Manetualain nai nusatetu-ikutema' a, nana huu mamahe ne' Yesus Kristus.

<sup>16</sup> Basa-basan fo manadui' nai Susura Makamoi' a nana tebe Manetualain ri' fee ne' lahenda ra fo dui' asa. Susura ria, sosoa-raraan, ri': nanori-nafada lahenda ra roo-tetu', natudu lahenda sala-sikon, hela-nore fali' lahenda leo eno roo-tetu' a, nanori lahenda ela tuka-tuka fai' leo la'o tuka Ramatua' a hihii-nanaun.

<sup>17</sup> No ria na, Susura Makamoi' a, tao namano'u-namadai Manetualain lahenda nara ela ara rabe'i tao basa nonoi-tatao malole.

## 4

### *Mu tui-beka Manetualain Hara-dasin*

<sup>1-2</sup> Neu' ko Yesus Kristus natafali leo dae-bafo' ia mai, fo homu pareta sama leo' mane'. Leo mae lahenda fo bei nasoda, ma lahenda fo mate si so, basa si reu rataa Ni fo Ana naetu' sira dedea nara. De, au hule tebe-tebe nai Manetualain no Yesus Kristus matan, fo mu tui-beka fee lahenda ra, Manetualain Hara-dasin. Sadia la'o maroo!

---

<sup>†</sup> **3:14** 2 Timotius 1:5; 2:2

Boso' afi mae ledo-fain malole a do ta'a. Matudu lahenda salan. Ma masa'ai si no malole ma dale nanenete'. Matetea dale nara pake nanori roo-tetu' a.

<sup>3</sup> Huu fo balahaa-binesa', lahenda ta nau ramanene nanori matetu' a so'. Ara rahii' ramanene noi mesen fo tutui nara naraa la'e no sira ridoo namanene nara.

<sup>4</sup> Ara ta nau ramanene nanori matetu' a. Tehuu rahii' ramanene noi tutui papake ta' ara!

<sup>5</sup> Leo mae leo' bea boe, o muste balaroe-balau aom. Manenete nai doidoso dale'. Mutui-beka Tutui Malole a ela lahenda ra sipo' Yesus Kristus. Malalau lahenda no dale namaho'o, losa' basa nonoi-tatao' ria. Boso' moi no dale poseseri'.

<sup>6</sup> Boso' tao aafi' neu au, huu fo au fai mamate ka nanenea' so. Au ia sama leo' galaas a, isi na saka' basa ni so.\*

<sup>7</sup> Tehuu au apo'ilalai' basa no malole. Au alai losa too a so. Au tuka ahere Yesus Kristus, ma ta heo leo bai' u boe'.

<sup>8</sup> Besa' ia, bei ahani noi hata esa. Ri' beker pareis fo ita Ramatua na peda mema' ana fee basa lahenda fo rasoda no roo-tetu'. Ita Ramatua na nana mana'ee dedea matetu'. Neu' ko naraa no ledo-fai na, Ana fee au beker pareis ria. Ma ta noi au mesa' ka. Tehuu basa lahenda fo sue-lai neu' Ana, ma rahani mamai Na, sira hapu beker leo na' boe!

---

\* **4:6** Tepo' fo lahenda Yahudi ra tao tutunu-hohotu' nai Uma Mamaso Ina a, hapu tutunu-hohotu' rupa' esa fo muste po'a oe anggor neu' mei tutunu-hohotu' a lain. Batee Paulus fee nasasama' nae, ria masoda na sama leo' oe anggor fo saka' po'a basan, ela dadi tutunu-hohotu' fee Manetualain.

*Paulus fee hehelu rupa' ara*

<sup>9</sup> Timotius! O lai-lai mai dama au dei!

<sup>10</sup> Huu fo besa' ia, au mesa' ka. Kreskes leo propinsi Galatia neu so. Ma Titus boe leo nusa Dalmatia neu so. Tehuu Demas nahii' noi hata dae-bafo papake ta' ia, ana foa ela au de leo kota Tesalonika neu so.<sup>☆</sup>

<sup>11</sup> Noi Lukas mesa' ana leo no au nai ia. Saka ma Markus, fo emi dua mai bela' a. Huu fo ana bisa tulu-fali rupa' ara neu' au nai ia.<sup>☆</sup>

<sup>12</sup> Au fee Tikikus leo kota Efesus neu so.<sup>☆</sup>

<sup>13</sup> Maneniko o mai sona, mafarerene' muni au jeket ka fo au la'o elan nai Karpus uma na nai kota Troas. Ma mafarerene' muni au susura kara, lena-lena' manadui' nai banda rou' a.<sup>☆</sup>

<sup>14</sup> Alexander manatutu riti ria, ana tao tadalu' dodou' neu' au so. Pesin neme' na, huu fo neu' ko Ramatua' a balas ana, tuka ria nonoi-tataon.<sup>☆</sup>

<sup>15</sup> Besa-besa mo lahenda ria, nana huu ana nahii' nalena laka ita dedea-nafadan.

<sup>16</sup> Tepo' fo au masososa apadei nai mana'ee dedea' ara matan fo asala'e au dedea ka, ta hapu lahenda esa sama-sama no au boe'. Basa si lao' ela au. Neme' na! Ela Manetualain nafarene heni sira sala-siko nara.

<sup>17</sup> Leo' mae leo na' boe, tehuu Manetualain ta foa ela au fa. Ana fee bebe'i-bar'a'ai' neu' au, ela au bisa tui-beka Tutui Malole Na ma ta kura-kai' hata esa boe'. Au tui-beka leo' na neu'

<sup>☆ 4:10</sup> Kolose 4:14; Filemon 24; 2 Korintus 8:23; Galatia 2:3; Titus 1:4    <sup>☆ 4:11</sup> Kolose 4:14; Filemon 24; Lahenda Nadedenu' ara Tutuin 12:12, 25; 13:13; 15:37-39; Kolose 4:10    <sup>☆ 4:12</sup> Lahenda Nadedenu' ara Tutuin 20:4; Efesus 6:21-22; Kolose 4:7-8    <sup>☆ 4:13</sup> Lahenda Nadedenu' ara Tutuin 20:6    <sup>☆ 4:14</sup> 1 Timotius 1:20; Sosoda I'io-o'oa' ara 62:12; Roma 2:6

basa lahenda fo ta Yahudi fa, ela ramanene Tutui Malole ria. Ma au boe po'i a ao ka eme' mamates a mai.

<sup>18</sup> Neu' ko Manetualain po'i na au eme basa tadalu' ara mai. Ma Ana napi pipi-nalala'o au no soda-mole', maso' leo nusatetu-ikutema' a u. Ria ri' homu pareta a nai na.

Manetualain marela-masa'a! Au io-oa ma so'u amadedema Ni, ta namaetun! Amin.

*Paulus dui' nate'e susura na*

<sup>19</sup> Boso' mafarene henin fee haraoe soda-mole' neu' susi Priskila,<sup>†</sup> no saon, bu Akila. Leo' na boe neu' Onesiforus kileoboboki nara katema'.<sup>◊</sup>

<sup>20</sup> Erastus leo nai kota Korintus. Fai ma'ulu na au foa ela Trofimus nai kota Miletus, huu fo tepo' ria ana namahedi bera'.<sup>◊</sup>

<sup>21</sup> Malale fo beita losa fai oefaa' a, te o losa nai ia so. Toraranoo Ebulus, Pudes, Linus ma susi Klaudia ma toranoo kamahere feke' fo rai ia, sira basa raru'u-ralosa' haraoe soda-mole' fee emi.

<sup>22</sup> Au hule fo Manetualain sama-sama no o losa do-doo na neu. Ma Ana natudu dale malole Na neu' emi basa.

Noi ri naa' so,

Paulus

---

<sup>†</sup> **4:19** Dede Yunani nai ia manadui' nae, 'Priska'. Priska no Priskila, nana nade' dua tehuu lahenda esa. <sup>◊</sup> **4:19** Lahenda Nadedenu' ara Tutuin 18:2; 2 Timotius 1:16-17 <sup>◊</sup> **4:20** Lahenda Nadedenu' ara Tutuin 19:22; Roma 16:23; Lahenda Nadedenu' ara Tutuin 20:4; 21:29

**Rote Rikou Alkitab  
Genesis and the New Testament in the Rote Rikou  
language of Indonesia  
Kejadian dan Perjanjian Baru dalam bahasa Rote  
Rikou**

copyright © 2004 Unit Bahasa dan Budaya

Language: Rote Rikou (Rikou)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-28

---

PDF generated using Haiola and XeLaTeX on 18 Apr 2025 from source files dated 31 Aug 2023

c176a22b-e2e0-537c-93d4-a9473a91795e